

明苑集

近時所聞、所見、所思、所歷，有感而發，作成詩詞，輯成《明苑集》

七言古詩

〈詠明妃〉

絕世傾城處漢宮，寂寞簷邊紅蕊枝，穠華芳姿無人惜，自開自落無人知，
一朝出塞別紫臺，始是君王初見時。此去萬里無歸期，朝有烈日暮嚴霜，
馬行數步三回首，瓔珞寶珠映淚光。哀思爲絃愁作譜，琵琶紛洩斷腸語，
鴻雁卻首不忍聽，客中行人神無主。明眸皓齒春風面，既入宮闈已堪傷，
風沙蝕骨終不悔，猶得日日見夫郎。從此玉骨沒胡沙，徒留青塚對斜陽，
魂依氈帳伴兩子，綠草長青似故鄉。

〈與友人乘船遊〉

長歌搖櫓泛清波，夾岸金柳影婆娑。披髮當風唯靜好，知己言語不需多。
紅素紛飛芳華雨，丹青巧匠畫不真，若無俗事掛心頭，與君長作桃源人。

五言古詩

〈庭前一株樹〉

庭前一株樹，樹下初相逢，與君離別後，花開又幾重？
寂夜月獨明，倚樹聽花落，忽見故人來，含笑一如昨，
邀我遊河漢，踏雲逐星輝，覺來知是夢，堪笑亦堪悲。
抬首望姮娥，借問瀛洲路？不羨仙家壽，願免多情苦。

五言絕句

〈夢故人〉

別來經十載，乍見喜幾狂。執手千千語，醒時淚兩行。

〈過高中母校〉

雨後花猶顫，風過香暗浮，青衿隨處見，不是舊時遊。

七言絕句

〈褒姒〉

玉面霜姿已作塵，幽王枉自戲群臣，堪憐一笑原非咎，翻作妖嬈引禍人。

〈思婦〉

白頭舊約付塵沙，鴻雁年年不到家。若把淚珠澆恨土，滿園開盡斷腸花。

〈與姊夜話〉

月明難寐共相言，怕擾家人半掩門。興至談文還論曲，不知日起照簾溫。

〈送別〉

天似多情細雨斜，遲遲行路盡殘霞。爲君持傘難輕放，且至橋頭燈火家。

〈相思〉

舊札斑黃愛若珍，燈前撫字更傷神。佛云應捨貪癡毒，爲爾長爲夢裡人。

〈期考前夕〉

夜闌孤燭弄窗痕，捧卷扶額識漸昏，忽出驚嚎聲慘烈，夢中錯答孟爲論。

七言律詩

〈期考當日〉

日移晷影近鐘鳴，肅殺唯聞冊頁聲。待釁牛羊紛齧棘，臨刑方寸忽澄明。
丈夫就義毋須懼，易水無還亦足行。提筆慨然迎試卷，絞心撓首苦愁生。

五言律詩

〈贈赭杉軍〉(赭杉軍爲布袋戲角色)

道者絳衣冠，神凝態自端。丹心憑日曜，劍魄映霜寒。
情厚酬知己，身孤挽世瀾。白頭終不悔，擔盡世間難。

詞二首

〈鵲橋仙〉

小園半頃，庭花千樹，滿案落紅懶拂。無人解識笛何爲？忍復見、時時陳列？
移杯換盞，添香設饌，莫負好春時節。休看柳絮舞風前，似別日、傾天飛雪。

〈風入松〉夜半夢舊時友，醒後有感所作

三更夢覺枕生涼，冷月照孤窗。依稀花徑遊春侶，忽回首、欲覓無方。風過珠簾
搖亂，聲聲扣斷愁腸。燈前常憶少年狂，輕騎綠羅裳。披襟展袖盛紅蕊，沐
韶春、和曲飛觴。蕭瑟如今人老，相思莫若相忘。